

Na osnovu člana 33.a Ustava Bosansko-podrinjskog kantona Goražde („Službene novine Bosansko-podrinjskog kantona Goražde“, broj: 8/98, 10/00 i 5/03), **d o n o s i m:**

U K A Z

O PROGLAŠENJU ZAKONA O IZMENAMA I DOPUNAMA ZAKONA O VISOKOM OBRAZOVANJU

Proglašava se Zakon o izmjenama i dopunama Zakona o visokom obrazovanju, koji je donijela Skupština Bosansko-podrinjskog kantona Goražde, na 27. redovnoj sjednici, održanoj 11. oktobra 2017. godine.

Broj: 02-02-334/17
11. oktobra 2017. godine
G o r a ž d e

P R E M I J E R
BOSANSKO-PODRINJSKOG
KANTONA GORAŽDE

Emir Oković

Na osnovu Poglavlja IV, Odjeljak A, člana 23. tačka b) Ustava Bosansko-podrinjskog kantona Goražde (“Službene novine Bosansko-podrinjskog kantona Goražde”, broj: 8/98, 10/00, 5/03), Skupština Bosansko-podrinjskog kantona Goražde, na 27. redovnoj sjednici, održanoj 11. oktobra 2017. godine, **d o n o s i:**

Z A K O N **O IZMJENAMA I DOPUNAMA ZAKONA O VISOKOM OBRAZOVANJU**

Član 1.

U Zakonu o visokom obrazovanju („Službene novine Bosansko-podrinjskog kantona Goražde“, broj: 2/10 i 12/14) u članu 17. stav (4) riječi “Ministarstvu za obrazovanje, nauku, kulturu i sport Bosansko-podrinjskog kantona Goražde”, zamjenjuje se riječima “Ministarstvu za obrazovanje, mlade, nauku, kulturu i sport Bosansko-podrinjskog kantona Goražde”.

Član 2.

Član 20. se mijenja i glasi:

“Član 20.

(Rješenje o ispunjavanju uslova za početak rada)

(1) Nakon usvajanja elaborata iz člana 17. ovog Zakona i dostavljanja zahtjeva za donošenje rješenja o ispunjenosti uslova za početak rada i obavljanja djelatnosti visokog obrazovanja, na prijedlog Ministarstva, Vlada Kantona imenuje komisiju koja ispituje ispunjenost propisanih uslova.

(2) Prije upućivanja zahtjeva visokoškolske ustanove iz stava (1) ovog člana prema Vladi Kantona, Ministarstvo provjerava urednost zahtjeva.

(3) Ukoliko Ministarstvo utvrdi nedostatke u zahtjevu iz stava (1) ovog člana, odrediće naknadni rok koji ne može biti duži od 30 dana za otklanjanje istih.

(4) Ako podnosilac zahtjeva u roku iz stava (3) ovog člana ne otkloni utvrđene nedostatke, Ministarstvo obustavlja daljnji postupak.

(5) Komisija iz stava (1) ovog člana broji pet članova od kojih su najmanje tri člana sa spiska domaćih i međunarodnih stručnjaka za ocijenjivanje i reviziju kvaliteta Agencije za razvoj visokog obrazovanja i osiguranja kvaliteta Bosne i Hercegovine (u daljem tekstu: Agencija) i najmanje jedan član ispred Ministarstva.

(6) Na osnovu ocjene komisije iz stava (1) ovog člana Vlada Kantona donosi rješenje kojim se utvrđuje ispunjenost uslova za početak rada i obavljanje djelatnosti visokog obrazovanja i isto dostavlja Ministarstvu na dalje postupanje.

(7) Rješenje iz stava (6) ovog člana je upravni akt protiv koga nije dopuštena žalba, ali se može pokrenuti upravni spor.

(8) Postupak rada komisije iz stava (1) ovog člana, bliže se uređuje propisom koji donosi ministar.

Član 3.

U članu 21. u stavu (2) iza riječi “umjetnosti” briše se tačka i dodaju riječi “i studija medicinske grupe nauka ako ima u radnom odnosu najmanje jednu četvrtinu od ukupnog broja nastavnika potrebnih za izvođenje nastave na obaveznim nastavnim predmetima za sve cikluse koje organizuje utvrđenim nastavnim planom i programom”.

Stav (3) se briše.

Član 4.

U članu 22. iza stava (1) dodaju se stavovi (2) i (3) koji glase:

(2) Uz zahtjev iz stava (1) ovog člana visokoškolska ustanova dostavlja osnivački akt i dokaze o ispunjenosti uslova za rad.

(3) Visokoškolska ustanova za čije osnivanje i rad se ne obezbjeđuju sredstava u budžetu Kantona, dostavlja i bankarsku garanciju za nastavljanje i završetak studija za slučaj prestanka rada visokoškolske ustanove iz člana 26. ovog Zakona ili prestanka izvođenja određenog studijskog programa u iznosu od 25% školarine koju su platili studenti upisani na licencirani studijski program.

Dosadašnji stav (2) postaje stav (4).

Član 5.

Član 23. mijenja se i glasi:

(Visokoškolska ustanova sa sjedištem izvan Kantona)

(1) Visokoškolska ustanova sa sjedištem izvan Kantona ili u drugoj državi može organizovati studij na području Kantona, uz prethodnu saglasnost osnivača i Vlade Kantona, koja utvrđuje da li postoji društvena opravdanost za organizaciju takvog studija.

(2) Društvena opravdanost iz stava (1) ovog člana podrazumjeva postojanje potrebe i opravdanosti za organizacijom takvog studija na području Kantona, a što može biti uzrokovano nepostojanjem takvog studija na visokoškolskim ustanovama Kantona.

(3) Na osnovu saglasnosti iz stava (1) ovog člana Vlada Kantona na prijedlog Ministarstva utvrđuje da li su ispunjeni uslovi iz člana 21. ovog Zakona.

(4) Vlada Kantona daje prethodnu saglasnost na odluku o upisu studenata u prvu godinu dodiplomskog studija na visokoškolskoj ustanovi iz stava (1) ovog člana.

Član 6.

U članu 24. iza stava (4) dodaje se stav (5) i glasi:

(5) Protiv rješenja iz stava (4) ovog člana ne može se izjaviti žalba ali se može pokrenuti upravni spor pred nadležnim sudom.

(6) Dosadašnji stav (5) postaje stav (6).

Član 7.

Član 31. mijenja se i glasi:

(Postupak akreditacije)

(1) Postupak akreditacije započinje podnošenjem zahtjeva visokoškolske ustanove Ministarstvu, najmanje godinu dana prije datuma za koji se traži akreditacija.

(2) Prije podnošenja zahtjeva za akreditaciju visokoškolska ustanova je obavezna izraditi samoevaluacijski izvještaj.

(3) Ministarstvo prosljeđuje zahtjev Agenciji koja Ministarstvu daje preporuku o ishodu akreditacije.

(4) Na osnovu preporuke Agencije kojom je utvrđen ishod akreditacije, Ministarstvo donosi rješenje o akreditaciji.

(5) Rješenje o akreditaciji dostavlja se Agenciji koja vrši provjeru usklađenosti istog i upisuje visokoškolsku ustanovu u Registar akreditiranih visokoškolskih ustanova.

(6) Akreditacija se izdaje na rok od četiri godine, nakon čega se provodi ponovna akreditacija.

(7) Zahtjev za ponovnu akreditaciju podnosi se najmanje šest mjeseci prije isteka akreditacije.

(8) Visokoškolska ustanova prestaje upisivati studente na studijske programe za koje ne dobije akreditaciju.

(9) Visokoškolska ustanova je dužna ranije upisanim studentima na studijskim programima za koje nije dobila akreditaciju, obezbjediti upis na drugu odgovarajuću visokoškolsku ustanovu, odnosno omogućiti upis na drugi studijski program na visokoškolskoj ustanovi.

Član 8.

U članu 54. u stavu (2) i (3) riječ “javnog” u odgovarajućim padežima, briše se.

Član 9.

U članu 55. u stavu (1), (3) i (4) riječ “javnog” u odgovarajućim padežima, briše se.

Član 10.

Iza člana 55. dodaje se novi član 55 a. i glasi:

(Vršilac dužnosti rektora, prorektora i direktora)

(1) Ukoliko procedura imenovanja rektora, prorektora i direktora visoke škole nije okončana do isteka mandata, senat će, bez konkursa, imenovati vršioca dužnosti rektora, prorektora i direktora visoke škole iz reda nastavnog osoblja stim što mora ispunjavati uslove potrebne za imenovanje rektora, prorektora i direktora visoke škole.

(2) Vršilac dužnosti rektora, prorektora i direktora visoke škole ima sva prava i dužnosti rektora, prorektora i direktora visoke škole.

(3) Vršilac dužnosti rektora, prorektora i direktora visoke škole rukovodi univerzitetom odnosno visokom školom do imenovanja rektora, prorektora i direktora, a najduže šest mjeseci.

Član 11.

Iza člana 68. dodaje se novi član 68 a. i glasi:

(Vršilac dužnosti dekana)

(1) Ukoliko procedura imenovanja dekana nije okončana do isteka mandata, nastavno naučno vijeće će, bez konkursa, imenovati vršioca dužnosti dekana iz reda nastavnog osoblja stim što mora ispunjavati uslove potrebne za imenovanje dekana.

- (2) Vršilac dužnosti dekana ima sva prava i dužnosti dekana.
(3) Vršilac dužnosti dekana rukovodi fakultetom, akademijom ili visokom školom do imenovanja dekana, a najduže šest mjeseci.

Član 12.

Iza člana 71. dodaje se novi član 71 a. i glasi:

(Vršilac dužnosti direktora instituta)

- (1) Ukoliko procedura imenovanja direktora instituta nije okončana do isteka mandata, naučno vijeće će, bez konkursa, imenovati vršioca dužnosti direktora instituta iz reda nastavnog osoblja stim što mora ispunjavati uslove potrebne za imenovanje direktora instituta.
(2) Vršilac dužnosti direktora instituta ima sva prava i dužnosti direktora instituta.
(3) Vršilac dužnosti direktora instituta rukovodi institutom do imenovanja direktora, a najduže šest mjeseci.

Član 13.

Iza člana 73. dodaje se novi član 73 a. i glasi:

(Vršilac dužnosti direktora studentskog centra)

- (1) Ukoliko procedura imenovanja direktora studentskog centra nije okončana do isteka mandata, upravni odbor će, bez konkursa, imenovati vršioca dužnosti direktora studentskog centra iz reda zaposlenika stim što mora ispunjavati uslove potrebne za imenovanje direktora studentskog centra.
(2) Vršilac dužnosti direktora studentskog centra ima sva prava i dužnosti direktora studentskog centra.
(3) Vršilac dužnosti direktora studentskog centra rukovodi studentskim centrom do imenovanja direktora, a najduže šest mjeseci.

Član 14.

U članu 90. riječi “do navršenih 70 godina života” brišu se.

Član 15.

U članu 91. riječi (“Službene novine Federacije BiH“, broj: 43/99,32/00 i 29/03), zamjenjuju se riječima (“Službene novine Federacije BiH“, broj: 26/16).

Član 16.

U članu 146. u stavu (1) tačka a) riječi “člana 55. i 58“. zamjenjuju se riječima “člana 55, 55a i 58”.

U tački b) riječi “člana 68“. zamjenjuju se riječima “člana 68 i 68a”.

Član 17.

(Rok za donošenje propisa i opštih akata)

(1) Propisi za sprovođenje ovog Zakona donijet će se u roku od šest mjeseci od dana stupanja na snagu ovog Zakona.

(2) Do donošenja akata iz stava (1) ovog člana primjenjivat će se propisi koji su važili do dana stupanja na snagu ovog Zakona, ako nisu u suprotnosti sa odredbama ovog Zakona.

Član 18.

(Usklađivanje rada visokoškolskih ustanova)

Postojeće visokoškolske ustanove obavezne su uskladiti svoju organizaciju, rad, opšte akte i ugovore o radu sa ovim zakonom u roku od šest mjeseci od dana stupanja na snagu ovog Zakona.

Član 19.

(Mandat organa Univerziteta zatečenih na dužnosti)

(1) V.d. rektor Univerziteta ostaje na dužnosti do imenovanja rektora po javnom konkursu u skladu sa ovim Zakonom.

(2) Prorektori, dekani i prodekani zatečeni na dužnosti na dan stupanja na snagu ovoga zakona, obavljat će svoju dužnost do imenovanja novog prorektora, dekana i prodekana u skladu sa ovim Zakonom.

Član 20.

(Stupanje na snagu)

Ovaj Zakon stupa na snagu osmog dana od dana objavljivanja u "Službenim novinama Bosansko-podrinjskog kantona Goražde".

Broj: 01-02-831/17

SKUPŠTINE

11. oktobra 2017. godine

G o r a ž d e

PREDSJEDAVAJUĆA

Aida Obuća